

云松巢集

朱希晦

文碩閣

wenshuoge.com

目录

关于我们	3
提要	5
云松巢集原序	6
云松巢集卷一	7
云松巢集卷二	15
云松巢集卷三	23
云松巢集后序	33

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

（臣）等谨案云松巢集三卷元朱希晦撰希晦乐清人至正末隱居瑶川与四明吴主一箫台赵彦铭游咏雁山之中称雁山三老明初有荐于朝者朝命未至而卒是集乃其子幽所编天台鲍原宏为之序正统中其元孙元諫刊板章陬又为之序原宏序称其飘逸放旷宗于李典雅雄壮宗于杜陬序称其思致精深词意丰赡滔滔汨汨如惊涛怒澜蛟鼉出没而可骇可愕今观其诗五言诗气格颇清而边幅少狭兴象未深数首以外词旨畧同七言稍为振拔古体又胜于近体溯其宗派蓋瓣香于剑南一集原序所称未为笃论也

乾隆四十六年十月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

云松巢集原序

初予在乐清咨访故老得瑶川朱先生希晦而惜其死矣先生当元季有诗名在士夫间而行检尤峻洁可重时秉使节下瓯越者如金宪宋公学士贡公皆愿见仪范以厉士风入国朝先生须髮皓白动合轨度幅巾短策徐行林壑望者以为神仙中人郡邑始行乡饮酒礼求齿德崇高名实相副足充大宾者而先生居首选予尝厕翰林修撰赵君彦铭客席得见梅湾诗八首而楮尾先生自署姓名惟予谨圭诵再四不能去手因扬推于众曰古人谓名下无虚士信然也而每欲见其诸子求先生全集以观未能也间尝道经瑶奥瞻先生旧第在丛林间而菟裘有曰永春庵者辄式焉永乐五年秋予自京师还龙鸣山中而先生之子翮袖出云松巢诗集谒予言曰翮先子平生之志发于咏歌者尽在是编愿序以垂诸远予谓诗自三百篇以后惟唐为盛唐人以诗名者千余家而李杜最着以故后世言诗者率以李杜为大家数而宗之今观是集其飘逸放旷者宗于李欤其典雅雄壮者宗于杜欤先生可谓善于学诗者矣惜予不得亲见先生以谈诗家利病而又庆其有子能守先生之家学也序而载名其上永乐五年十月晦日迪功郎伊府纪善天台鲍原弘撰

云松巢集者乐清朱先生希晦所赋咏也先生家瑶川世有令德自幼嗜学励行有志于古人元季遭海内乱遂囊括不仕益闭户读书以究其业下笔才思泉涌而于诗尤工故因物寄情伤时感事凡有触于外而动于中一于歌焉发之日增月积多至千余篇扁其室曰云松巢而稿因以名焉自先生没迄今五六十载而瑰词藻句往往传诵于世予每见而窃叹之且以未获覩其全集为恨正统庚申其玄孙美从予读书空明山中间尝捧先生遗稿示予请为之序予发而视之但见其思致精深词意丰赡滔滔汨汨如惊涛怒澜蛟鼉出没而可骇可愕要其所至多有得于唐人大方家之心法而无雕琢委靡之气故沈潜反复累日不厌焉尝因是推之先生以有为之才不幸生于季世故形于言者澹然无求于时而怡然有安贫乐道之志往往自放于山巅水涯以寄其兴而摸写云林泉石之幽以及草木昆虫之变虽所寓不同而皆曲尽其妙至于闵时病俗婉词讽刺又有得于风骚之遗意焉故玩其词想其人而知先生之不遇为可叹也使其生于明时而出其所有以鸣国家之盛岂不伟哉虽然先生之志固不获自见于世而其可以传世垂后者未必不在乎是矧其诸孙咸有志以继述而美方以俊又选为郡庠生异时业成名就以昭先生之德者尚有待也若然则是集之传将弥久而弥彰矣奚待序而显哉然美之请甚勤有不容于终默者因书以归之正统六年岁在辛酉四月初吉赐进士出身行在礼部主事台郡章陬撰

云松巢集原序

云松巢集卷一

（明）朱希晦 撰

○五言

寓兴【四首】

乾坤一旅亭大梦几时醒白髮无情极春来不再青
山中无别事诗酒作生涯鬓雪空催老何由驻日车
山寺钟声歇夫寒睡起迟敲冰添砚水发兴写新诗
风尘犹瀕洞江海转深沉不作乘桴兴徒懷击楫心

○六言

江村冬日清景

屋外梅花的皪篱边涧水潺湲竟夕诗翁睡着不知雪满前山

寒江独钓

翠壁寒云淡薄沧江老树萧疎输与扁舟渔父一生意钓忘鱼

云山僧

树暝烟生絕壁瀑流雨洒虚潭他日来寻懒瓚枯禅还许同参

秋日客懷

百岁光阴石火几番世事云萍试问谁人有药能医白髮重青
梧叶声中夜雨桂花香里秋风巢幙偏惊客燕寄书不见征鸿
桑落谁家有酒荷蓑客子无衣斜日江楼北望凉天鸿雁南归

○七言

西湖

丝丝细雨弄春晴新水溪头杜若生我欲与君携酒去绿阴树底听啼莺

客箫台书懷

有客寻幽蹈紫霞杖藜入竹访仙家相逢不道春光老门外溪风落栋花

云山僧舍

千山万水一枝筇身在烟霞第几重最好雁边秋色净倚天空翠出芙蓉

秋日和韵

溪上危峯乱插空雨晴苍翠尚蒙蒙不堪昨夜西风急吹落半庭霜叶红

次御史端公游箫台韵

烟锁千峰紫翠层隔溪幽鸟语相应碧桃花谢玉芝老不见神仙只见僧

寄友

不道愁中生白髮也知客里对黄花凄凉正是陶元亮有酒无钱何处賒

戏简叔向陈先生朋南阮君

名动竹林惟阮籍气吞湖海有元龙相逢一醉思茗饮细故不留云梦胸

秋懷

怪底浮云翳碧空千山秋水入溟蒙何当一扫羣阴尽坐看东方片日红

酬李适庵

谩笑人生有底忙读书坚坐白云房孙阳未遇骐麟老空厄盐车太上行

酬间上人

潮退沧江露石矶生緣千古一天衣葛藤牙蘂依前长影落长空寒鴈归

和槐堂李先生韵

人生离别将奈何沧江渺渺山峩峩山花乱红江水碧水流花谢春愁多

又

江山有待故人来好向春风酌绿醅啼鸟声中春烂漫雨香昨夜碧桃开

喜雨

稻田渴水十日晴水车踏转如雷鸣老夫中夜喜不极睡觉枕前闻雨声

和赵翰林韵

脱却春衫换酒来深杯劝客壮怀开生前万事不如醉落日乌啼金粟堆

寄友

雨过溪头鸟篆沙溪山深处野人家门前桃李都飞尽又见春光到楝花

和谢玉堂归老赵修撰

佳客乘闲访隐居旋沽村酒鲙溪鱼灯前忽忆十年事留宿壶山夜读书

用赵修撰先生韵

结屋山中远市嚣雨余荒径长蓬蒿平生身外无他事劝客尊前有浊醪

夏日山居

九衢赫赫涨尘埃车马憧憧自往来争似山人忘世念枕书高卧竹扉开

寄天则上人

老年衰病药相扶岂有神仙碧玉壶睡起不知春雨过半畦佳菊没榛芜

次回峯西堂韵

孤云无住亦无依长向空中自在飞情素本来无一物何须惜别更留衣

次李二丈韵

看花醉眼不须扶花下长歌击唾壶回首荒城春较晚淡烟疎雨緑平芜

春日有懷

无邊花柳竞芳春醉眼看来几度新今日曲江风景别落红飞絮正愁人

次回峯韵

暖日浮烟翠欲消四山空寂境萧条饱参禅老庭前栢不问刘郎观里桃

○五言律

净名寺【鴈山十八刹之最胜者】

纔入清凉境凭高意豁然山横烟簇簇溜滴雨涓涓静坐维摩室微参达磨禅秦名人已遠遗像阅千年【秦名故事见鴈山志】

寄无际老禅

万事不挂服把茅还葢头林深從鹿卧海阔任鸥浮圆泽三生契曹溪一宿留我牵尘业在衰白总成休

失鴈

畜尔经年从悬知羽翮长别来应念侣秋至忽南翔遽欲摩云汉能无恋稻粱更防机事密罗网不虚张

感时

阴霾昏日月妖气塞乾坤战血流淮水音尘隔蓟门浮荣槐蚁集丛谤棘蝇喧欲效东陵隐终身老种园

又

触目伤时事干戈郁未开百年驰白日万里涨黄埃废苑犹花柳荒城但草莱登楼作赋罢不独仲宣哀

秋日咏懷

老作衡门士长思栗里翁
鬓添今日白颜减向时红
满地蒺藜雨一天鸿鴈风
伤心看江水日夜只流东

又

天地一今古江山几别离
浮云苍狗变急景白驹驰
老去犹诗律忧来更酒卮
自從弦絕后无复觅钟期

感秋

时光随过鸟身世寄蜉蝣
漠漠江云晚萧萧塞雨秋
杜陵长恋阙王粲独登楼
故国今戎马南征尚未休

时事

贫病知交态驱驰愧老身
蓟门深雨雪淮海暗风尘
虽有楼船将能无柱石
臣会须安反侧早晚畫麒麟

轩居

何处净芳襟晴轩俯碧岑
钩帘賸月色隱几快人心
世道有荣辱云山无古今
吾生何太晚侧耳聽虞琴

伤时

叹息王纲废由来战伐频
周墟半禾黍秦籍总灰尘
鳳去云霄暮鸡鸣风雨晨
至今流渭水空忆钓鱼人

春日自况

江邊雨初过正是踏青时
载酒兴不浅杖藜行较迟
日阴团碧树风暖韵黄鹂
与客恣游赏醉来还赋诗

期倪從事不至用韵以寄

天地双蓬鬓江湖一酒杯
不因佳客至争得好懷开
拄颊看山坐登楼待月来
黎明还送别歌罢重徘徊

次韵答李适庵

泛渚轻鸥并啼霜旅鴈孤池幽心自佚路险意何须兰茝香堪佩茅茨细可诛荣名安足羨耕钓乃吾徒

答李广文

不有封侯相安能食肉飞溪山犹发兴鱼鸟自忘机曳杖看云去褰衣步月归骊珠忽在手怪底吐光辉

次韵答友

天地等逆旅利名俱恼人蓬莱三万里庄木八千春白积巾中雪红飞陌上尘人生行乐耳杖履素相亲

次韵答叔向陈君

之子当时杰人中见不多豫章蟠厚地砥柱障狂波富贵须行乐栖迟足啸歌相逢尊有酒莫惜饮如何

次韵懷友

江山供遠眺万景倍凄清烟树连秋色霜钟报晓晴忧时双鬓改恋阙寸心明谁识杜陵老长吟涕泗倾

漫兴偶成

扰扰贪名者驱驰易白头江山长不改岁月急如流且尽一尊酒共消千古愁可怜金谷废人去月当楼

写懷

试拂青萍剑频衔白玉杯容颜不再好笑口几时开水满鱼儿出泥香燕子来江山千古意临眺重徘徊

约友

川岳自今古阴阳相主宾红尘纷野马白日少间人忽忽身将老欣欣物自春相知有朋旧簪盍莫辞频

简雪心安上人

意行无远近得得扣柴扉
鼎出金芽细盘堆紫蕨肥
看云忘世虑指日悟禅机
错比陶元亮重来尽醉归

简叔恭蔡先生

举世纷谗舌锋芒不可干
驱车嗤阮籍学易慕丁宽
试问黄河险何如蜀道难
太平无补报只有寸心丹

春日访友人

行寻春草径坐敞白云扉
展席面流水抱琴看翠微
纷纷浮世改落落故人稀
尚意陶征士柴车日暮归

写懷

急景催人老能令鬓有霜
清时思俊杰拔萃愧材良
鹏鷃自高下鹤鳧终短长
山牕读书罢静坐一炉香

春日

春来锄药圃客去掩柴局
衰鬓不重綠好山依旧青
微名空自绊大梦几时醒
已悟身如寄乾坤一旅亭

次韵谢箫台叶成翁

市上一区足人间万事非
把杯邀月上隱几看云归
宇宙身将老山林兴不违
几时来鴈荡长啸豁岩扉

上杨指挥将军

圣主登宸极奎躔烂遠天
新开丹鳳诏瑞纪赤乌年
山野搜遗逸朝廷集俊贤
老农还喜剧买犊事春田

次郑成翁韵

郑老欣相遇杯浮竹叶清
江關秋已半山雨夜初晴
河映疎星淡牕悬片月明
悠然縱谈笑懷抱为君倾

和李子光韵

门外客初到坐闻流水声看书芸叶乱醉酒烛花明夜静河汉白秋高霜露清玄心开一笑诗思忽然生

能仁方丈

山中松桂老浓翠郁纷纷水壮蛟龙气风高鸿鴈羣浮岚晴后见疎磬夜深闻却忆龐居士衰年屏俗氛

云松巢集卷一

云松巢集卷二

（明）朱希晦 撰

○七言律诗【五十四首】

大龙湫【即能仁寺大瀑布】

入眼千峯翠作堆喜寻龙鴈窟中来半崕有日飞晴雪一壑无云吼怒雷驻锡已知尊者意挥毫空想谪仙才忘归亭下忘归客手弄潺湲坐碧苔【忘归亭在瀑布下】

送王田著作归赤城

江海飘飘万里身醉游随处乐天真地无王气非佳地人有方瞳是异人可恨龙盘遗建业谁怜鱼腹葬灵均明朝杯酒还相别愁送骊驹又送春

夏日书懷

沧江无处不风波欲理扁舟可奈何白髮生涯人已老綠阴时节雨偏多杯倾鸚鵡同谁醉剑拂蛟龙强自歌蓋世功名非我事终期结屋卧云萝

和习之郑先生韵

愧我才疎齿俊髦也知文物胜弓刀松邊展卷白日静柳下系舟春水高自昔襟期同郑老当今藻鉴失山涛凭谁说与观风使要活疲民去吏饕

感懷

自叹頽然一老翁十年奔走鬓飞蓬中原虎斗干戈满四海人忧杼轴空葛亮平生恢复计汾阳材畧中兴功何当遠望春陵郭佳气朝来正郁葱

排闷简王同善囷上人

流光过眼已侵寻富贵何须满坞金人世自生今日事朋交不改向时心管寧老去常乌帽元亮归来只素琴记取岁寒同雅操长松青映栢森森

秋兴

月明何处乱啼乌坐久徒怜永夜徂千里關山双雪鬓百年城郭半烟芜穆生谢病先辞楚张

翰知机遠忆吳衰晚不如归隱好故山随处且樵苏

寄周廷石

门外曾无长者车一身奔走岂安居谁怜杜老长为客我怪洪乔不寄书烟色春归杨柳底雨香红入杏花初溪山咫尺风尘隔却忆人情会面疎

有所思

虚闻将帅拥彤戈勇銳谁如马伏波几处烽烟连夜急四郊风雨向秋多最怜絕汉歌长鹄却怪长安履紫駝俛仰乾坤增感慨悠悠身世定如何

有感

城东向晚进风凉思酒无由入醉乡人寿不同天地老客愁应共水云长沧江风转芦花起旧圃秋深草蔓长安得归来遂幽意呼童净扫读书床

伤时

流年华髮两相催眼底烟尘郁不开太息有人趋玉食可怜无地筑金台城邊向晚黄狐立海外何年白雉来万事何如一醉好且须洗盞酌春醅

时危

初闻羣盜起河北胡乃流毒江东西落日空城见烟树秋风满地喧霜顰人忍贪残作蛇豕畴能愤切诛鲸鲵中兴自古须将相济时有策安黔黎

悼时

北风猎猎吹沙尘天阴雨雪愁杀人江湖万顷舞蛟蜃山數千年藏鳳麟苏卿使节未归汉商皓采芝先避秦重华世遠不复见嗟哉风俗何由淳

自叹

匠石搜林弃樗散不材何敢玷簪裾家贫羸有千金帚国难曾无一箭书今日总戎师管葛明时征士用严徐野人不作功名念欲效陶朱共养鱼

忧时

总怜黄鹄从离羣只影孤飞日暮云淮海十年流战血楚天万里接妖氛凄凉王粲登楼赋感慨相如谕蜀文自古英雄亦何限几人戡乱树功勋

和友人韵

谁能餐玉驻颜光两鬓都消镜里霜岂有雄文驱海鳄恨无长矢射天狼十年南国风尘满千古东陵草蔓荒兴发会应寻范蠡扁舟散髮弄沧浪

别云山老禅

风流老禅思不羈悠然邂逅川水湄谩笑支郎爱神骏素闻玄度能工诗天關九重守虎豹江海万顷生蛟螭枣大如瓜信可食何时径往寻安期

别困上人

鼎食何如饱蕨薇由来富贵履危机鹤鳧依旧自长短鹿马至今谁是非每好问奇兼醉酒那堪惜别更留衣人生聚散知何处风送秋云一片飞

简李二丈

满地兵尘暗夕烽可怜憔悴更衰容故人消息沉双鲤白日光辉转六龙适意从■〈扌 弃〉拈浊酒发音谁解奏黄钟管寧已向辽东去欲买扁舟恨莫從

与夏彦伯

白首相闻非一日青春倾蓋动兼旬艰难总为泛舟役羈旅乃得连床亲鳳凰叫月箫台夜蛟蜃翻云玉溜春此别何时重会面不堪回首隔风尘

答沙都事

尚忆当年羽葆乘河流如带绕山冈男儿墮地四方志竹帛垂名千古香越石枕戈终破敌苏卿持节未归乡慨予疎懒成何事祇合藏身老墨庄

次韵简猴山侯德询徽之二征士

幽寻杖策遶林泉随处遨游兴洒然曾向山中招隐士欲来海上候神仙云深丹灶长瑶草水满石池生碧莲薄暮凭阑时送目白鸥飞雪点江烟

次韵简仲谦倪公叔向陈先生

老夫头白犹眼青喜瞻北斗聯文星陈生饭客甌忘簞倪子业儒锄带经矫矫龙蛇出大泽翩
翩鸾鳳摩青冥方今征贤急如渴会见戈帛辉林垧

予伤时不古知老将至叹息成诗呈诸同志

泾水何曾混渭流心忘宠辱自无忧底须老执扬雄戟且复闲寻范蠡舟不见越裳来白雉徒
闻蜀岭过金牛由来感慨關人事回首春风忆旧游

送天衢首座还故山【鳳凰山今在海中去永嘉界可三百里元时航商所集国初禁絕以杜
倭寇】

鳳凰山上瞻华蓋师住白云知几重海日楼台金翡翠天风亭榭玉芙蓉已经大顶骑驯虎更
向灵源觅卧龙昨日遠公曾有约禅余看雪最高峯

寄习之郑先生

人生异路分云泥山尊酒綠思同携雪色上头老冉冉风声落叶凉凄凄南阳深处尚龙卧北
荡空山惟鴈啼何日相期游汗漫手弄白日凌丹梯

赠倪仲谦

江海鸥盟幸未寒曾将尺素问平安每懷徐孺空悬榻却忆逢萌早挂冠半夜明星连寶劍九
秋清露溢铜盘谁能授我长生诀白日丹成生羽翰

次竹隱二弟韵

侨居村僻面江郊又见兰阶玉树高两袖秋风停野骑半篙秋水漾渔舸别来每忆歌棠棣老
去犹闻爱绛桃惆怅对床空有约几回风雨夜萧骚

懷古寄友

昆仑峯顶何巍哉五城楼阙天中开坐招洪崖驻羽蓋笑把西母倾霞杯古今人世一大梦英
雄霸业仍堪哀铜仙泪漣承露掌野鸟歌上琅琊台

答玘上人

岩扉昼静白云生一枕松涛入梦清华髮故应知老态淡交还复见真情参玄已悟三乘法汗
简何须万古名我住蕩南君蕩北平生懷抱几时倾

简彦明赵征君

羲和鞭日竹苍冥百年世事如云萍自怜老去鬓俱改谁道春来愁不醒野岸风微柳花白江
津水暖蒲芽青鲔雪红肥社醅熟几时一到河山亭

次适庵李先生韵

悠悠身世更何如布褐由来胜锦裾今日岐阳无凤凰秋风笠泽有鲈鱼功名底用传身后道
业还应继绪余更好买田深筑室相期黄髮老岩居

春晚感懷寄李广文

玄髮经年半已斑避喧何计入深山我无大药能医老谁有真金肯买闲三月花开反惹恨几
时酒醒一开颜别来若有新诗句好倩邮筒日往还

酬申屠翰林

人中至寶识璠玑词气飘飘遇子虚五夜南宫曾赐被十年东观饱看书宾筵秩秩尊三老祖
帐纷纷饥二疏吳越溪山信清美杖藜随处胜安车

和韵简天则上人

凉风裊裊晚秋天潮落双门缆客船【永嘉郡城北有二门郭璞所以立名双门】九陌黄尘
蓬髮底一篱香露菊花边故乡鲈膾牵归思近砌蛩声搅夜眠不道分携成遠别几时林下细
谈禅

九日

秋晚林皋木叶飞凉风裊裊鴈南归自惭席上着乌帽不见门前来白衣瓮满香云醅酒熟盘
飞红雪鲔鲈肥兴来随处堪行乐何必佩萸登翠微

呈丹霞老禅

一蓑风雨一渔竿家近梅花涉水滩投报已无青玉案驻颜寧有紫金丹龐公老去独耕岷李
愿從來久隱盘自古山林有遺逸敢将名字动天官

次韵谢东白叶先生

三径归来细竹斑山人本性爱丘山紫扉半掩红尘满诗句长哦白日闲豪气固应嗤梓泽幽

栖不独羨商顏旧传却老方应驗我欲相從问大还

訪双溪上人遇

双涧萦回石径微烟嵐分翠湿人衣松林夜静鶴初睡花院日长僧未归万里云霄飞锡遠半江风浪渡杯迟无緣相见空相忆自叹心期与愿违

述懷寄刘休休居士

云遶青山水遶溪隱居滋味只羹藜春风底事生华髮暮景何須待紫泥写罢素书无鴈过唤回清梦有猿啼长安市上多年少賜锦纷纷竞鬪鸡

營寿圻

在世徒懷身外忧汉家陵墓已荒丘乌鸢夺食终难忍龙虎图形莫浪求千載空遺两翁仲百年同是一浮沤何如早约柴桑老結社得随惠遠游

依韵奉謝原礼先生

枕溪住处溪水深竹树云屯青满林摩詰詩为有声画淵明趣在无弦琴鸛鸾冲霄五彩翮騏驎伏枥千里心雄篇贈我细把玩光价岂止双南金

次潘北山郑叔允韵

闲来兴趣倍清新自爱青山作主宾天上几时停白日世间何处避紅尘莺花满目娛佳景鷄黍同盟忆故人笑我年衰才较拙敢将一曲和阳春

臈日偕叶东白蔡伯恭登西岑

絕顶云生一径通寒生短髮却天风千年物色闌干外万井人家图画中宿雨乱滋嵐树碧朝暾深浴海波红我来欲訪香山社醉酒长吟忆遠公

寄天寧方丈

霜树萧萧万叶丹谁怜倦客尚江干性情每向詩中写勲业何須鏡里看万里江山秋月老一天星斗夜光寒近来满目多荆棘始信人間行路艰

簡士举陈教諭

忆昨天南独倚楼，德星炯炯夜悠悠。贾生名重醇儒列，韩愈才高博士流。老去囊中无长物，由来皮里有春秋。他年禁直皇居近，天禄书多待校讎。

呈浦云赵修撰

忆昔承恩入禁闱，儒林便觉有光辉。九重旭日开金殿，五色春云照锦衣。庠序人思三老去，都门祖饯二疏归。归耕幸喜身康健，雨足东皋陇麦肥。

刘休休病起

买得南山为卜居，青松绿竹荫吾庐。日长门外堪罗雀，水满溪头好钓鱼。脱粟饱时过禁裔，杖藜行处当安车。家僮忽报长须至，喜接平安一纸书。

寓兴

白髮园丁喜种园，谩将方法教儿孙。土膏有力须培本，鎌铁无情莫刈根。葵藿不堪资鼎食，韭菘足媚盘餐。吞腥啄腐今何限，谁识芳鲜味独完。

寄适庵李先生

九衢辙迹黄尘满，一隙驹阴白日过。俗事绊人清兴少，山尊留客好懷多。悬知李白偏能赋，却羨秦青最善歌。自古荣名身外事，耕云只合老岩阿。

书懷呈同志

今古浮荣不足论，一生旅寓任乾坤。轮囷漫长千年木，濩落还成五石樽。谁复挂冠辞汉阙，客多鼓瑟向齐门。野人自信无机事，年老何妨且灌园。

用韵简叔向陈先生

门前车马纷如蚁，草径幽深肯暂过。老去冯唐饶髮白，归来季子得金多。春江水阔鱼初上，晓树烟开鸟欲歌。頼有故人相慰籍，杖藜数数到岩阿。

寄李适庵陈叔向二先生

中年作恶不胜情，无复芳尊酒共倾。老我韶华如逝水，多君诗律似长城。江东千里暮云合，池上几回春草生。想见凭阑亦清絶，阴阴绿树有啼莺。

幽居漫兴

地絕塵喧境自寬溪南山色坐中看竹吹綠霧沾書帙花發紅雲映藥欄常養泰和知氣壯不
求征祿得心安自從一笑忘魚后年老何曾把釣竿

云松巢集卷二

云松巢集卷三

（明）朱希晦 撰

○古选【四十五首】

憎鵲

吾闻反哺乌至孝有纯德鸟中比曾参传诵人皆识又闻驯化雉翔集在咫尺陌上随行车饮啄自朝夕嗟尔蜀幸帝愚暗亡其国游魂化为鵲物理固莫测一身尚羁旅羽毛亦虚饰生雏百鸟巢蝼蚁竟饱食春风口流血有恨啼不息侯门拂笙竽豪客纷弹射岂不思南归奋飞摧短翼何如雉与乌飞鸣随所适

和困上人爱松吟

众木与时谢孤松自寒色深根远莫移老干益堪惜溪南有余地尘外颇幽寂手种一万枝心期二千尺风云歟交会雨露浸生息他日此盘桓清阴覆泉石

比述

轩辕初铸鼎鼎成乃登仙龙髯不可攀白日飞上天嗟予堕世网安得穷山川鼎湖渺何许怅望秋风前

又

寶镜何团团光辉莹冰雪疑是造化炉神工初铸出又疑广寒宫飞堕一片月照人不照心红颜易衰歇

又

彤弓如半月力挽二石强戡乱乃见用橐鞬寧又藏应弦不虚发狐兔焉敢当畴能挟长矢为我殪天狼

又

东南有美箭出自稽山竹初发号哀猿再发落飞鹄忆射聊城书功成一何速贤哉鲁连子千古仰高躅

自述

老鹤复老鹤笼中稀饮啄岂无万里心高飞向寥廓

又

君看堂上燕差池自双飞一朝秋风起巢空何处归

又

驱车出城东禾黍生故宫君看两铜驼卧此荆棘中

又

驱车经北邙悲歌泪如水君看冢累累埋没蓬蒿里

所思

鹦鹉本聪慧不与凡鸟同因以巧言语何由脱樊笼

又

百舌复百舌间关弄春晴谗臣在君侧巧语谁为听

又

门前好杨柳春风摇绿丝花飞乱白雪青春能几时

杂咏

户枢动不朽源水流不浊修身保天和味道得真乐

又

北叟塞上马秦人宫中鹿语默知是非得失见祸福

又

嗟彼横江鲸一朝着钓饵何如五总龟曳尾泥涂里

上陈员外

荆山郁嵒崑屹立高摩空光辉韞奇璞瑞气成白虹草木借余润飞雨青蒙蒙悬知有至寶追琢烦良工连城未易酬美价璠玕同行将献天子持入光明宫

和谢一源上人

道人来蜃江移席秋夜深天高明月出清辉浴波心道人来鴈荡悬锡青松岑瀑布落晴雪烟霏生夕阴谢公去已遠遗迹谁能寻讵那宴坐处千古开禅林莲宫耸突兀布地皆黄金何时一洗耳试听颖师琴平生履几两亦有山水淫悬知羣鸟中有此孤鳳音行当谢世事与子同浮沉

和简叔向陈先生仲谦倪公

我家雁荡南啸傲云松下平生伯牙弦不恨知音寡晚交倪与陈荏苒几寒夏骐驎日千里鼓车岂合驾緬思昌黎公低头拜东野文润三峡流毫端恣挥洒奋飞既胡越有懷不可写新诗来启予沧江珠盈把于时月露清竹叶澣金笋遗音锵钩韶古意薄风雅遥瞻德星聚炯炯光照夜汉廷方渴贤平步登金马譬如礲砢材匠石岂云舍寧为汲黯憊无效齐王假披肝见精诚结舌类喑哑古来英雄人起自耕隐者

次本之侯先生【侯居猴山宋节毅公侯畱之孙】

忆昔抱长剑去作东南游猴山高刺天翠遶藏书楼修竹净三径往来惟羊裘苍龙未变化紫鳳曾栖不上揽明月辉下盼沧江流酒酣发长啸万籁生清秋别来难再晤奈此人事稠每懷招隱处桂老山更幽隱士不可招援桂聊淹留赋诗且自乐斗禄乌足谋

纳凉

无事解衣坐超然心境空深林翳炎日万壑来天风闲停白羽扇试拂朱丝桐醉罢不知夕月生沧海东

自述

槿花不终朝幽兰有余香朝游诗书圃夕憩翰墨场饱食待秋实过眼捐春芳畴能事形役奔走白日忙男儿生堕地壮志在四方胡为守一室郁郁徒悲伤何由写胸臆酣酒竭疊觴高飞羨黄鹄矫翮凌云苍

除夕

麒麟在灵圃瑞世为祯祥五蹄而一角形类非犬羊西狩不得时折足遭鉏商宣尼空悲叹涕泪沾襟裳

叹世

乾坤一开辟日月常往来朱颜不再好白髮专相催
旷视藐万古荣名安在哉遁世有余乐何必求蓬莱

答东白叶征士

至寶惟人材所寶非全璧緬懷古圣贤俯仰流汗赤龙媒
日千里遠道如所适一鸣万马瘖见之皆辟易伯乐虽相知
不辨骊黄色斯人去我从千载犹旦夕伟哉东白翁平生数
亲炙南望吹箫台矫首空叹息何时一相见斗酒浇胸臆
醉酒且勿言中心期饱德

写懷

人生有定分胡为乱天常尺土乃培塿散樗非栋梁
观鱼慕庄子御马思王良丈夫贵知己鬱郁徒自伤

又

野老何愚庸团形從大块林居玩清景悠然与心会
佳菊没榛丛幽兰伍萧艾岁晚水霰交见之徒感慨

又

巢居不厌客况乃佳客至撷蔬荐浊醪谈经得真趣
归云度遥岑斜日在高树对饮须尽欢何时复相遇
人生能几何行乐贵适意不见萍与蓬飘飘无定处搔
首仍踟蹰临风发长喟

杂咏

威鳳备五彩羽毛一何奇歟乘长风起误落天南陲
朝食琅玕实暮栖琼树枝行当凌八极斥鷃焉敢窥

自况拟古

风波在平地世路几瞿塘懷哉贤哲人千载能留芳
悬知萧艾多不比猗兰香老翁聊自笑髮短心甚长

又

羲和鞭六龙白日不我待读书竟无成坐惜朱颜改
长安夸鬪鸡豪华岂长在何由得成仙高

飞向蓬海

又

人生天地间儻若尘栖草恨无大药资容颜岂长好白璧终销毁青松亦枯槁饮酒且放懷毋为叹衰老

又

隱士居丘园衡门守荒寂啜菽甘有余饮水清无极嗤彼夸毗儿浮荣定何益梓泽今已空春风蔓茨棘

自述

吾闻汉中郎琴斲焦桐尾絙以朱丝绳遗音中宫征上弦操白雪下弦弹綠水世无赏音人谁能一倾耳

又

狂世等浮云变态何纷纷龙媒行万里耻与駑骀羣自從周道废雅颂不复陈愿言继先哲千载垂清芬

又

羣书日夜读往往皆陈编何如穷物理朗悟心中天坐来万想灭灵府何翛然所思在良友使我长悁悁

山居自况

嗟予任疎懒落落负明时玄髮儻已改素心终不移焚香读周易觴酒调朱丝所乐在冲澹浮名良可嗤

齿疾

我今老将至辅车邀病魔一语不出口终朝卧林阿退之念脱落幼輿能啸歌蔬食滋味少咽漱津液多眼明幸读书流年任蹉跎

答汪谦之先生

江城满楼台月夜吹笙箫神仙集华盖鸾鹄来丹霄中有羽衣客举手欣相招扶桑朝出日溟海秋翻涛一身藐八极御气时游遨悠然视天宇万古同沆寥却思卧玄圃天鸡弄嘒嘒饥餐金光草渴饮玉卮醪何当乘清风蹑鲤随琴高

自述寄友

十月天雨霜木叶半凋悴巨海增波澜羣峯献苍翠身居一窝中意出万象外喜闻古人言颇胜俗客对设席罗酒浆未饮已心醉曜灵急西驰盛年岂能再送子纔出门天风舞兰佩

义鹞行

林深结暝色苍翠摇烟霏维时春夏交众鸟巢高枝于中有双鹞卵育常及时春鉏亦有托旦夕欣相依雄飞远求食雌来哺其儿啁啾聒人耳坐厌腥风吹羣雏半黄口翅短争习飞间或遭弹射滋味焉足奇弱者强之食感慨徒伤悲海鹰何从来鸢猛一何酷蹇腾复盘旋意欲喂饥腹老拳不空施利嘴贪食肉鹞兮善护巢飞鸣急驱逐鹰兮虽善扬鬻馋岂知足鸟雏頼生全脱祸免荼毒扶弱在抑强足以厉风俗岂不见兄弟怒阅墙夫妻雠反目恤怜当救灾敦姻须睦族禽鸟尚急义人情何反复吾言非箴规履行宜自勗

卧云卷为陈去题

吾闻仙人中有希夷子冥栖华山颠高卧白云里

和友人韵

孤桐生高冈幽兰出深谷雨露含碧滋烟霞媚幽独佩惟楚客纫琴待良工斲嗟彼春风前纷纷艳花木

和彦逵叶先生韵

姬周得天下乱臣纔十辈王纲一解纽政教何茫昧宣尼抱麟泣此意谁能会从来六籍灰文风委蒿艾穷兵尚专征岂识包桑计故国悲黍离日落寒云翳吾闻昔盛时萁莢生尧砌

冬雨叹

癸卯冬十月海隅气候偏风南忽风北寒燠非常年缁袍御还脱长箠挥不捐胡为黄落时花卉纷争妍虫鸣应蛰户虹见饮长川兼旬苦雾密暝与痴云连深泥污后土行潦凌高原农夫辍耒耜劳叹心悁悁二麦不得种饥坑讵能填格鬪况未息中原拥戈鋌天家重租税疮痍谁能怜安得倚天剑一扫开青天金乌任腾翥出自扶桑颠阳光照六合比屋俱欢然

○古风

月夜放歌海

云卷尽明月来天光镜碧无纖埃
嘯歌于此兴不浅美人对坐飞琼杯
碧桃花香夜初静露滴衣裳怯清冷
安得两翼飞上天为渠拂拭山河影
乾坤一照越光明就中杀却妖墓精
上诉天公契人意免教朔望生亏盈
玄霜捣成谁可食好向仙娥问消息
服之到老无饥渴赢得读书眼常碧

有感

君不见千里马有时困羈勒不遇九方歟
龙文更谁识又不见五彩鳳有时铩羽翮
不如鷺与鸡聚族自争食人生遭轆轤
俯仰今犹昔贤有不黔突圣有不暖席
圣贤尚栖栖我独何惻惻但恐白日沉
年光竟虚掷乾坤等蓬庐寿命非金石
愿餐不死药蓬瀛杳难觅乘化复奚疑
委心任所适故国遗铜驼秋风暗荆棘
霸图有兴衰人事无休息矫首望归云
鸿飞楚天碧

赠国恕先生客中识面始见如故

先生卜筑依林藪编蓬为门瓮为牖
心造羲皇太古前道传邹鲁千年后
隱遁寧非鷖冠流龙钟已是龐眉叟
子真谷口自耕岩中散山阳空锻柳
平生视世一浮埃富贵于身复何有
床上常堆元晏书尊中满泛柴桑酒
兴发挥毫黑电飞粲粲骊珠惊落手
诗成不啻万人传吟罢如闻百灵走
五岳之中泰华尊下视羣山俱培塿
我因流寓偶相逢识面便似知心友
藹然和气即阳春徒尔芳妍映衰朽
剧谈不了清夜徂光动文星逼南斗
人生会合良有时叹息欢娛岂能从
起来击剑为君歌歌长剑作蛟龙吼
明朝别去遥相思渭北江东几回首

客邸中秋对月

去年中秋秋月圆浩歌对酒清无眠
烟霏灭尽人境寂仰看明月悬中天
今年客里中秋月静裏金波更清絕
可怜有月客无酒不照欢娛照离别
夜阑淅淅西风凉月中老桂吹天香
悠然长嘯动归兴坐久零露沾衣裳
浮世悲欢何足数庾楼赤壁俱尘土
风流已往明月来山色江声自今古

雪夜放歌

羲和羲和鞭六龙白日西飞几时歇
旧年已去新年来苦厌兵尘尚骚屑
嗟予流寓客未归年老思家心欲折
江云黯惨北风来一夜雨花吹作雪
夜长祇有梦还家梦破衾裯冷如铁
起看宇宙絕纖埃彷彿三山白银阙
羣阴渐灭阳气回柳眼舒春草芽出
君不见汉袁安僵卧闭门肤欲裂
一朝富贵来逼人经邦论道称材杰
又不见唐杜甫饥走荒山泪成血
致君有术徒自怜布褐许身侔稷契
我今齿落百不堪况乃疎顽临事拙
愿销兵甲事春农四海清平万民悦

秋夜长

秋夜长不成寐床前月光白如纸歌窈窕懷清冷夜中怪底荒鸡鸣倒裳起舞感慨作乾坤无处无戈兵空山孤鹤更清唳忧懷欲写茫无际坐看黄叶坠我前零露漙漙下庭砌明星烂烂银汉横铜壶滴滴刻漏长事殊兴极聽转悄夜如何其渠未央秋夜长长如此年来谁识征夫苦忍抛儿女戍边城妇事姑嫜应门户嗟尔羣栖乌绕树徒惊飞岂知孤鳳凰集彼朝阳枝可以舞箫韶銜瑞图一四海混八区鳳兮鳳兮覽德輝鳳兮鳳兮覽德輝

寄云山寺僧人草堂

白云深羃羃青山郁峩峩道人无住着奈此青山何山中草堂花映戶禅味由来最清苦嗟予寥落徒相思身絆尘緣乃遠阻李邕侯懶瓚公平生道气长塞胸法中老将人中雄曾翻砚水作玄雨号令神物驱蛟龙謁来谈笑九天上坐使六合生华风苍生戢戢俱在甄陶中公今顧我如有意会飞杖锡凌苍空

答元易陈先生

人生自古多离别尺书遠寄何由彻短世光阴过隙驹坐觉朱颜易衰歇君看乔岳千尺松挺立苍然傲霜雪风来彷彿苍龙吟六月清寒换炎热槿花虽荣不足论朝开暮落香已絕只今尚忆江湖游扣舷一歌寬我忧腰间老剑欲飞动紫气郁郁横清秋虚名役人浪自苦黄尘两鬓风颼颼千古乾坤等逆旅百年生死同浮沤君不见鷗夷子功成去养鱼千头

藤杖贈西原道人

山人贈尔藤一枝怪形偃蹇如蛟螭平生丘壑我所爱魑魅惊走安敢窥梓潼当年贈桃竹书阁照夜然青藜吁嗟古人迹已遠能无此物相扶持赵州八十始行脚芒鞋健步双龐眉登山涉水览幽胜意倦未必忘归期旧传化龙不复见能解虎鬪安足奇吾师履行极平坦世人方寸生九疑云山住处本禅寂猿鸟为伴真相知大千由来在脚底要探理窟穷玄机鼓枻还從甬东去出门一笑孤云飞

简子文林训导

东风落尽辛夷花遥忆美人天一涯美人从别音信杳想见只今双鬓华山房幽深市器遠白日枕书眠碧霞崖高瀑布洒晴雪净洗石鼎烹春茶平生青紫不挂眼荣名絆人安足夸当年我来访遗迹拄杖看云着双屐玉箫吹断鳳不来但见千峯倚天碧台前日夜溪水流金星光动溪中石【邑志西溪有金星石石点点如金星】脱身拟欲恣幽栖坐占琼台炼金液衰年悞墮尘网中齿豁头童竟何益

和戴文準

材重椅桐价璧瑜山川清气孕魁奇谈经夺席输年少独步当今更有谁君如局促辕下驹平生志气壮万夫虞卿穷愁书始着孟轲好辨言非迂今人虽生古人后古人岂与今人殊要吞五车在胸次取之无尽用有余圣贤道脉传不泯名悬万代日月俱致君唐虞比稷契岂但可托六尺孤文风远扬起颓俗才行杰出称醇儒我今见君一倾盖情同鱼水交欢娱丈夫重义轻富贵厚颜滥禄非吾徒却笑扬郎老执戟一官不徙谁吹嘘多君韞椟同美玉不待善价安肯沽何妨教儿压新酒长歌且鲙松江鲈

○五言长律

借韵简叔向陈先生

干戈寻满地愁杀杜陵人云蔽青霄日风扬碧海尘积骸腥血满飞檄羽毛新倦坐凭乌几长吟岸白纶拥麾思宿将伏阙忆忠臣何日梟羣寇余波泽四民朝廷安反侧草莽足容身会见祠郊庙歌诗荐白麟

次韵自述寄连隱君

林下栖迟好一窝天地春流年催白髮随分守清贫伯乐能知马商鉏不识麟素琴当挂壁黄卷从堆尘交友慕徐穉從人嘲子云世情多反复道味独醇真田野深禾黍溪流半藻苹白云闲伴鹤明月静窥人酩酒能无醉论文会有因相期游汗漫垂钓汉江濱

答李子光

羣鸡溷野鹤意气独昂昂谁料红尘里能逢白玉郎双鳬俱北翥一鴈独南翔从别何须叹相思岂易量声名过沈鲍制作拟班扬笑我人材拙何如袜线长流年悲白髮却老慕仙方仅得清而瘦终期寿且昌篱边栽细菊径底植修篁抱瓮田畦外操觚涧水傍蹉跎千里志愁絕九回腸公子多文翰天葩压众芳朝廷崇礼乐歌颂美成康堂上莱衣舞阶前蕙草香瑶琴弹緑绮雅调合清商指日罗英俊承恩步玉堂

和包原彬韵

旅食京华日莺啼上苑春鲁连惟仗义范叔不辞贫絕域来龙马清时出鳳麟襟懷开霁月谈笑接清尘沧海三枝树青霄五色云酒倾香味别诗写性情真吳地追游好龙山入梦频烟花如媚客风雨似留人男子生何幸朋交素有因遥知理归楫随处觅通津

答适庵李先生韵

价高由少室望重自元纁奕世遗簪笏清时识鉴衡文章尊贾董智勇贱黥彭珪璧含余润埴甕协正声岳分嵩峻极源出渭流清宾馆怜巢幕侯门耻餽鯖平生敦夙好俊逸藹芳声律已

纲常正填心道义精
鹑悬衣可结毫健笔能耕
诗垒时坚壁词场夜斫营
别来常慕藺何日遂班荆
紫气寧临顾函关枉候
侦风姿劳我梦月旦与谁
评栢厉凌霜操葵倾向日
诚朝廷严战伐川泽困渔
征羣豎凶犹活诸公愤不
平器歆因满覆昭弛在排
檠漕待木牛运功须汗马
成轮云知变态金石见交
情烟瘴连淮海风尘隔薊
城行当洗兵甲且复酌杯
铛击壤欢农父传书走价
侔山林聊自逸猿鸟不须
惊鳳阙瞻佳士鸡窻忆旧
盟蓬蒿栖仲蔚松菊媚渊
明琴调朝飞雉笙歌午啜
莺乾坤万里在寒暑四时
更愁髮长千丈吟髭白数
茎穷居仍野处坎止任流
行相去如吳越思君太瘦
生

云松巢集卷三

云松巢集后序

云松先生諫七世祖也以詩名于元季與四明吳主一蕭台趙彥銘先生游咏鴈山中時稱為鴈山三老先生之詩清麗簡亮不事纖巧感慨咏嘆而有余思元人多尚辭而意或不足是以興趣漠然而音节无闻先生以不求仕进故得专心肆力所谓清丽简亮者锵锵乎可以振唐人之遗响而下视元季之萎弱者矣先生为人甘贫乐隐遭乱避地所至多与文士交名山胜境游览殆遍自梅溪西转永嘉之柯村羁旅数年至国初四方底定然后归时已老矣有司尝以姓名着荐剡不及领朝命而卒平生不事生业田止数十畝仅供飭粥临终令悉入祠堂以奉祭祀虽有五子而分寸无所预以所作云松巢诗集一册端砚一方古本文选一帙付诸子曰汝可守此无忘我素志诗各体凡数千首不能尽刻録噫子孙若諫者愚駮不肖安能尽探先生之所蘊而去取哉姑举其易知而易习者以训吾宗之子孙而已耳然多清丽简亮而有格力自可以入大方家而名于后世矣諫不肖不敢以愚駮辞谨辑成集复序于末云嘉靖七年秋九月朔旦七世孙諫谨序

云松巢集后序